

四庫全書

集部

欽定四庫全書

集部

太白山人漫藁

目錄
卷一至

詳校官庶吉士^臣李如筠

中書^臣劉源溥覆勘

總校官原任中允^臣王燕緒

校對官中書^臣牛稔文

謄錄監生^臣蔣翰

欽定四庫全書

集部六

太白山人漫藁目錄

別集類五

明

卷一

古樂府

卷二

五言古

卷三

七言古

卷四

五言律

卷五

五言排律

卷六

七言律

卷七

五言絕

卷八

六言詩

七言絕

臣等謹案太白山人漫稿八卷明孫一元撰
一元字太初自稱秦人或曰安化王孫也嘗
棲太白之巔故稱太白山人又嘗西入華南
入衡東登岱又南入吳與劉麟吳琬陸崑龍
霓稱茗溪五隱晚而就婚施氏遂卒于吳興

麟為文以表其墓一元才地超軼論者至以
王猛之流擬之其所為詩排鼻凌厲往往多
悲壯激越之音讀之極伉健可喜朱彞尊至
謂其辨香在黃庭堅持論雖不免稍過然當
秦聲競響之日而能矯然拔俗如此亦可謂
獨行其志者矣明史藝文志載一元太白山
人稿五卷此本為崇禎中湖州周伯仁所刻
凡八卷蓋據吳興張氏本及陽湖本而合輯

之者原錄于八卷末尚標有補遺若干首而
卷內無之蓋當時有志搜訪而未得也閔元
衢歐餘漫錄載一元逸詩有送許相卿詩一
首見許氏譜題王伯雨園亭二首見烏青鎮
志和吳甘泉詩四首重遊一首君馬黃一首
見真蹟飲馬長城窟一首見盧志菴所錄續
于紀宣符家得十四首又稱鮑稚歲家有其
詩抄約千餘首則其散佚亦多矣乾隆四十

四年正月恭校上

總纂官臣紀昀臣陸錫熊臣孫士毅

總校官臣陸費墀

刻太白山人漫藁題辭

孫太初先生以超軼絕世之才遊半天下卒卜居於吾湖攷其年僅三十有七而當時之偉人傑士無不折節下先生若得交於先生為幸者沒之日各分任其平生所屬使無復有遺憾非有一段不朽者沁入人心奚以至於斯余生也晚不獲炙先生但見湖之先薦紳大夫及耆舊之士每嘖嘖稱先生為畸人至得其詩藁中片紙隻字無不寶為弘璧天球也者當年諸刻惟余外家

張氏本稱善而歲久業荒悉以飽蟻鼠之腹有心者傷之長兒仁偶過舅氏從零落中見其僅存者什之一因覓其原本又從友人處得陽湖本合為補苴并傳誌敘言彙成一集以流布海內俾海內之慕先生者知先生之詩瓢猶有在而當時劉元瑞鄭少谷李空同諸君子所以表章先生者令千載如見云藁曰太白山人存舊志也崇禎己卯春日吳興周中度身為父題

太白山人漫藁序

太白山人漫藁者吾友孫太初所為詩也夫曰漫者觸而成聲無謂有謂之云也太初關西豪傑也束髮入太白山為山人繼入終南汎觀恒岱遵龜蒙慕宣聖遺韻止於鄒魯之邦久之踰江淮下吳越鶻冠布袍獨立於萬象之表志子如也夫高蹤遠影者顧以世為不足為乎及讀其詩皆悲壯奇崛感激奮發而卒澤以中和如神龍在淵變化不測得時而興乘雲雷而雨天下噫是

豈忘情遁性為犁與耜者倫乎或曰太初離親戚去墳墓遠遊于方之外與名教或不相蒙者是何言哉孔子曰丘也東西南北人也復欲居九夷嚴子陵去齊適越管幼安徙於遼東孫明復隱居於太山之陽邵康節去家入洛四十而後娶古之賢達流寓於外要必有所為而安焉者獨太初爾邪或曰吳越之人右文人易致名譽太初操觚飾智揚揚然為高意有終南之捷者夫以太初之才稍自抑以應今之世何往弗達顧甘心寂

寥卒其世以飭無端功名邪吾嘗與太初乘月汎洞庭
浩歌漁父傲睨一世若無少芥蒂於其懷又嘗與卧西
湖之上見其息深深時乎天長時乎地久要固有道者
吾聞無欲而後可應世今之應世者可勝議哉漫藁凡
若干余為之序以傳藁而曰漫則固傳也太初不與也
正德戊寅歲春二月少谷山人晉安鄭善夫書

余序太初漫藁成太初曰子真知我者又明年庚辰
而太初死遺命以漫藁必付余余歸弔其廬撫其孤

攜其橐至杭梓而行之凡與太初遊者如杭人許台
仲陳遂初高世美湖人施邦直沈仁伯徽人程世大
孫道甫戴仲良率來集事於乎使太初復生諸君當
不愧其平生之言乎是年秋七月望善夫志

太白山人漫藁序

太白山人漫藁成予友少谷子以示予於勝果寺俾序之序曰吾讀太白山人詩而知吾越山水之盛也吾聞山水能生奇人矣太白山人秦人也入吾越時未有詩名久而漸張公卿方伯連帥之尊與卑優伎之賤無弗知有山人者吾越山水之助也夫寓吾越者多矣而何獨一太白山人乃得其助蓋山人以其雄壯渾厚之資肆之以詭怪佳麗之觀若甘和白采之合美故其詩往

往為人所傳而予固知其必傳于後也夫既能生奇人
矣而奇人自外至者復能留焉留之者與生之者等也
故因以知吾越山水之盛又曰太白山人江湖間不可
無也漫藁之刻太白山人不可無也有太白山人然後
重江湖有漫藁然後太白山人重少谷子之意也今之
神山人者曰山人長髯白面玄談靜養決非凡骨真仙
或可成也器山人者曰山人宏才廣識知兵曉吏事使
之用世當若古之王猛者流而惜其流落不偶也有鄙

山人者曰山人豈無父母妻子親戚墳墓而乃溺情忘
反也山人願學林逋矣而何卒取少艾以自污也棠陵
子曰太白山人不可鄙也神之者誣矣器之者或未必
然也江湖之間不可無也予嘗遇山人於姑蘇之臺竊
欲友之而吏事牽矣山人於少谷子盡讀交遊所贈而
曰獨心伏于崑山予嘗感其知而再會無由矣然有待
也蓋高明之士一變必殊絕吾及其變而友之當有得
矣嗚呼已焉哉又曰太白山人已矣能使少谷子收其

藁以傳又能使劉元瑞諸君子治其後事予友吾惟可
崛邁之士也而於山人每心伏焉殷近夫余畏也而畏
山人皆有忘形刎頸之意嗚呼山人可謂得豪傑之心
者矣夫用世者在先得豪傑之心然則太白山人雖謂
之用世之才可也

正德十五年閏八月二十日棠陵方豪漫書

欽定四庫全書

太白山人漫藁卷一

明 孫一元 撰

古樂府

拊劍篇

天風揚蓬海水嘯波白日慘光嚴霜被柯

一解

廣野千里豺虎滋多朝無英雄守土奈何

二解

余本秦人久客吳中楛矢不忘志念忡忡

三解

十年無家被褐不完拊劒長視歌聲無懽

四解

自君之出矣二章

自君之出矣冷煖何所依不能見君面但見篋中衣
自君之出矣生死那可不知不能保君身但保襁中兒

邊人曲

燕山風高白草枯月明何處夜吹蘆邊人戍久不忍聽
淚濕腰間金僕姑

雉子曲

麥穗長雉子肥雄啄啄雌依依迎風鼓雙翼吐綬爛錦
暈鶯鶯以為儔鷹鷂遠相飛願哺爾雛願戢爾衣不近
齊人終無禍機

解所佩日本小劔遺殷近夫作公莫舞

晴空一夜走白螭河鼓下照寒江湄葛盧之山元氣裂
神物將化天有為鐔頭驚見赤花古轆轤純鈎皆莫數
千年碧血燐火明萬里陰風髑髏語帝王氣象佳葱蔥
玉虹提攜行相從座上酒酣公莫舞要是當時隆準公

楊白花

簾幕閉重重六宮春已暮
金梭萬丈絲不挽楊花住

班婕妤

紈扇歌初歇開簾草又新
如何雙燕子占斷六宮春

郎住竹塆口

郎住竹塆口安住楊柳暝
楊柳絲空長不能繫郎船

驅車復驅車

驅車復驅車起拂車上露
願作車後塵逐君車輪去

古別離

有酒復有酒餞子河梁路離情不可整風亂道旁樹

雉子曲二章

花葉正田田雉子行哺雛錦暈覆滿身相顧還相呼聖人在位民用和只今四海無網羅

花萼正離離雉子行相求飲啄青山下雌雄鳴且酬四座沉沉動歡酌堂上何人奏此樂

吳女詞三章

開簾示畧歌剪花金刀冷脉脉情轉深誰牽轆轤綆
當牕織錦字拋梭聲啞阿弟不肯間拆我牽牛花
燕尾剪空寒花苞纔小吐吟成春恨詞隔窻教鸚鵡

倦倦林中鳥二章

倦倦林中鳥羽毛隨所依風霜太酸苦肯念身不肥
倦倦林中鳥一枝聊卑棲驚驚不我昆鵠鵠莫我嗤

春江曲

家在銀塘住微茫隔烟霧春水新生偶沒篙鴨嘴峴崩

人不渡問船盡日澹無歸擁衣夜宿青汀露

採蓮曲二章

越女顏如玉和歌行晚風舉頭乍相識棹入蓮葉中
蓮葉翻亂紅正在若耶曲願見隔溪上對坐關眉綠

太白山人漫藁卷一

欽定四庫全書

太白山人漫藁卷二

明 孫一元 撰

五言古詩

雜感八首

白日下悲泉
瑟瑟寒風鳴
羣芳悴中野
豈不懷孤英
冥運有興沒
主者亦何情
竭來南榮趨
還當抱此生

棘岡生廣庭
出入良嶮巖
鷺鷥不遐顧
崑崙安可期
偏

側居人世感此末歲悲去去勿復道悠悠祇自知

太古固無言有言淳朴喪詩書已失真龍馬終成象身
生羲皇後心在羲皇上萬事多變遷真宰自無恙

中古造無射耗財空備器元聲未擬和佞言滿朝市所
以百年來戎馬無糞地畎畝事征伐土風轉頽至安得
虞舜絃為我理六氣

大道無狹邪全德萬物備白日浴咸池悠然會此意熠
燿爭微光鷖鷖矜小智欲辨已忘言滄溟浩無際

抱易住青山長日青山對煙雲散不收晨昏變奇態應
知住山心不在萬物內乾坤古神器機運誰謝代以道
獵衆能兀兀意獨在歸來南郭翁天根同一慨

昔年雲中士被褐離塵表相逢契夙心結我平生好臨
別海門東贈以玄芝草殷勤再致辭教壽浮丘老至今
不敢遺終身願持保但恐風雪深與時同枯槁

齊州赴宿諾滄海歸茆廬浴髮清冷中沙月動影虛天
風颯然來吹我白菟裾手持古松枝朗讀鶴背書輕身

鍊五芽去與元化俱

江上逢春感興

嚴雪散寒雨堅冰開積霰青陽變脩條東風回舊林節
物感孤志連翩春江潯椒花遠自媚清尊強費斟十年
一被褐百回結塵襟豈無鄉關念所愧國士心開匣撫
神物牀頭流泉音冥運誠嶮巖履茲思何深不徒一朝
奮要在萬物任清詩繼絕響聊此抱膝吟

遠遊

海水照髯影天風吹角巾
早年負奇好五嶽散閒身
日觀倚高寒車箱夢猶真
一笑謝塵世採藥青澗濱
偶來不解事長句驚四垠
幾年聞格鬪中原白骨新
山鬼夜啼血層雲愁高旻
青鳳叫孤月茫茫鼎湖春
攀髯不可得終歲泣遺臣

讀高士傳

鐘鳴山閣靜晨起自櫛頭
霜樹被繁實日出紅欲流
稚子裹糗糧下澗汲寒湫
焚香開卷帙靜坐法前修
因看

龐德公鹿門真可求

靖江西浦與殷近夫別

離節動青郊高筵敞江濱
哀觴為懼酌溫念忘客身連
山瞰水陸平明眇烟塵清曦升
木末長風吹遠津桑麻
接上國炎海為南隣生聚豈
鹿豕行當逆龍鱗結交非
在多要得允衷淳古來豪傑士
寄託各有因患難苟相
得誰論骨肉親政當寫明愛
安可辭苦辛結此園中草
炯言懷好春

春日吟

地偏無往來空庭春正深會此淑霽景花木弄繁陰去
去散芳躅風來吹我襟意得不能語野鳥酬好音翛然
遂忘倦盡力還幽尋纖纖孤月上遲遲白日沉呼來林
居子還當期此心

東門行

晚出東門道停車望眼舒悲風橫空來瑟瑟吹我裾芳
華盡銷歇杞枳生郊墟我前跑野獮我後號山狙無家

問樂土八九村
疇虛飢民抱子出野哭
還赳赳他方尚格鬪
盜賊驕有餘四海困轉役
人命化為魚有魂招不得
剪紙滿溝渠涕下浸露巾
幽懷何時攄

與甘泉老人入董嶼山

天風下高木寒日墮蒼蒼
對坐青崖底卸杖白石傍
瓦甌出泉味布袍受松光
雲霞有古好芝桂永相將
還攜韓終輩去訪蓬山陽

訪樵者

遠尋山中樵不識
山中路隔林伐木聲
遙憶林深處不
晤竟空歸日墮西陵樹

江上餞別友人四章

晨起促征鞍
薄言駕舟楫
送子赴脩河
不忍與子別
蘭茗會摧殘
爲蔓不堪結
悽悽情未宣
惻惻心欲折

心折憑洲渚
玄雲構重陰
慷慨撫時序
况此離別襟
嘈嘈佇繁吹
戚戚理哀琴
暫延林莽間
睠此念彌深

念深重離筵
含酸聽我歌
天寒冰漸結
君徂當奈何
窮

獸不出數倦鳥豈離柯期子早歸來歲晏守山阿

山阿遵時晦人文會陸沉履運多嶮巇感念昔與今淒
風振修薄嚴霜被喬林願言同此夕寤寐思所欽

送周用賓進士訪道入少華山

有引

嘗聞齊人安期生以策干項羽羽不能用欲
封之侯不受遂亡去予謂古之仙者往往皆
豪傑輩為之友人周用賓棄官訪道入少華
山予喜安期生之風感激於斯人因作是詩

以送之

滄江望不回孤峰晴自立猛虎嘯天風肯為人所繫嘗
聞安期生畫策君未入歸來謝煙火清露中天吸千年
玩弄間人世風雲集坐此無窮門滅景鍊玄汁

山中石菖蒲雨過忽開九花喜而盡采食之

山中一雨涼窻前曉氣清菖歎忽開花一葉冒九英文
石帶淺碧照我几簾明嘗讀古仙傳此草天之精出有
靈物護時見雲氣成上帝憐我苦服之令長生玉杯收

玄露采花浮輕盈但覺五情好旋茹毛骨輕便當謝人
世去去東蓬瀛

種松

種松滿崑丘眼中生蒼鱗松根化為石松葉不受塵中
有結廬者長年事隱淪入雲荷長鑱斲苓青澗濱木食
有奇志乃與天為隣放歌白雲裏去去空山春

田舍早春作

今辰初解凍遠望田苗稀日出會羣情鳥雀相喧飛村

婦荷鋤至隔舍烟火微阿童三尺箠驅羊散柴扉風來
廣郊陌春事正依依

侶魚

清池耀明鏡綠萍淨相依水面散寒花樹底風生微主
人時夕來釋杖坐苔磯叢石圍小島遊魚吹浪飛眼中
銀潑刺鱗光亂斜暉物我澹無言相對兩忘機余亦觀
化者願與子同歸

收菊花貯枕

呼童收落英晨起晞清露滿囊賸貯秋寒香散庭戶夜
來夢東籬枕上得佳句

秋夜同紫峽逸士雪江老僧輩十人宿南屏山
中誦逋仙夕寒山翠重秋淨鳥行高分韻賦詩

余得夕字

荒煙散不收殘山帶遙碧林鷗晚依依草雉時喁喁斜
光明不定居人掩荆柵竭來喜盍簪林下語幽磧屋屋
燈火青野蕨旋新摘豈無伏虎禪亦有飛鳬客愛此小

崑丘人世白雲隔願當抱奇幽炯言永終夕

江上送殷近夫奉母東歸

春色滿汀洲沙晴鷗鵲遊故人別我去回首江之隄半
月屆水宿挂颿風力柔芳蘅美遙碧閒雲澹不收遠見
蒜山月晚泊瓊花洲推蓬慈顏喜得魚沙市頭人生會
有別歡聚不知憂平明望齊魯乘流發櫂謳

我愛陶弘景

我愛陶弘景不受萬乘束挂冠事棲遯歸來卧空谷青

山讀玉書白鶴下高木乃知悟悅心長日雲相逐

我昔何所夢

我昔何所夢所夢在南箕下騎蒼麒麟被髮浴天池日月相磨盪雷電為爭馳魚龍舂撞死風雨失所師蒼水使者怒九漚丈人知長跪告丈人臣實愚以証願當謫下土廣輪受譴羈手持青藜杖濩落無所之朝投崑崙巔暮宿渤澥涯腥羶厭塵土所過多魍魎沆瀣不自飽五內常抱飢渾沌日斲喪顏色非舊時翩翩黃鵠鳥相

望不相隨空懷雲錦字無由報歸期

王野雲見寄華山誌忽憶余曩昔月下著羽衣
醉吟蓮花峯上今已三載自過江南無此豪興
喟然而歎作詩寄謝故道及之

憶昔遊上清長風吹羽被仙人九節筇扶我蓮花側太
空借韶濩羣動聲相嚇石髓酌天瓢此物山不惜醉倚
洗頭盆月華凝欲滴獨鶴驚夜半回首秋雲碧三年萬
里遊此事墮今昔媿謝山中人默光運闔闢

與杭東卿憲副論宋人詩

勃興黃九窮妙處空自知坐海不用舠孤嘯三山湄邇
來幾百載還受世人嗤平生陳正字白首不相疑入門
坐盤礴知有古畫師

紫陽山中徐步

窮壑卧孤松寒風生杖屨幽人獨往來鳥哢自成句因
山賸得秋欣然有餘趣片雨弄江光孤雲起汀樹望中
水似天嘯坐漁舟去

雲居子

龍山有高人結茆亂雲裏愛雲不出山自號雲居子晨
夕餐雲腴眼中綠筋起十年不見人偶逢青崖底古心
仍古顏相看不作禮但問何處來翠靄濕芒屨予亦澹
忘言笑拈金鵝蕊

程節婦

君身倚桐枝妾身葛藟草相感纏綿意永言百世好一
朝詎推傷妾身寧自保生死願從君寸心日杲杲不學

浮萍花東西蕩風沼

吳興北亭與邦直別

青松盤巨壑不受人間塵
鸞雛與衆鳥自飲砥柱津
羣情貴苟合難以保厥真
吾與夫君交終始道相親
同擷雲中草還尋天上春
一朝來告別去作上國賓
正值歲時暮况與豺虎鄰
咽涕重感傷手挽君車輪
寒禽各嘯侶落木亦悲辛
惟願君歸來卧此清澗濱

寄斗笠翁

有序

予往年在山陽時有客斗笠短褐訪予於山
中因與坐古梅樹下竟日視神氣超然了無
酬對一笑不別而去予意甚奇之今年甲戌
孟冬八日有遠客至忽寄一詩云憶昔山陽
時訪君古梅邊青山不隔雲飛來滿座前風
格正堪似氣味亦相連竟日不作語此是象
帝先自從別君來想像山月圓恐君為世用
墮落天亦憐海上若木枝島中玉禾田引領

候君歸寄此黃澤篇乃海門羅先生耳予即

惘然感悟作詩從此逝矣

往年斗笠翁相對空山裏坐撫古梅根眼中蒼鱗起景
象入無言玄冥乃至理別來經幾年夢想隔丹雘昨得
白雲詞披覽忽驚喜重感至人心涕下悲未已若木與
玉禾一望幾千里揮手謝塵凡長往從此始高歌碧雲
回一劍駕海水

聞劉元瑞按察使棄官與甘泉山人候久不至

南國有高人棄官萬里道晨夕問音書相候青林杪歲暮悲風塵會晤苦不早何日入門來捋鬚傾懷抱東山吳居士況汝平生好竭來同幽棲笑拾金光草

三隱逸詩

嚴子陵

子陵太公流垂釣跡相似一朝載後車尚父任國事陵也帝王師諫議非所志桐江一絲輕煙水從此逝文叔惟故人侯霸乃奴隸高踪邈難攀清風滿天地

徐孺子

刑人弄神器漢道日將覆羣賢抗大義機露身先戮矯
矯南州士雲卧匡山曲高鴻卷青冥潛虬媚幽獨竭來
世可遺力耕食自足四海弔黃公千里芻一束下榻走
陳侯身尊道不辱緬邈有斯人千古仰高躅

陶淵明

淵明豪傑人出處亦有道昔讀荆軻詩彷彿見懷抱晉
室漸陵夷一官非所好劉裕乃何人天意亦草草歸來

卧潯陽甲子紀年號酒乃寓真情菊也見孤操

夢遊黃山吟

朝看黃山圖暮夢黃山行手捫天都月一笑雲煙橫丈
人眉如霜采秀忻相迎酌我以石髓遺我以瓊英泠然
跨黃鵠更欲遊空明羣峯忽不見一舉還自驚覺來發
長歎半牕松雨鳴

曾大尹世榮饋江魚

平生味道腴藜莧心自足邑侯念此意遠饋春江玉驚

犬吠成羣打門走健僕雪花初出水鸞刀破銀腹風味
極不常更倒牀頭醪隔座目力窮到手盃盤速麤糲得
解圍吟聲動花竹

石川子

魯門有狂客昔隱泰山中高謝九州事自築一畝宮鹿
裘才掩骼悟悅晨夕同飲牛汶水湄訪道尸鄉翁物情
視蛺蝶動長嘯回天風偶來遊汗漫邂逅瀛海東語笑若
宿好顧我啓方瞳授我玉屑飯五內煙火空久當遺凡

蛻相將入無窮

贈鈍翁

豐狐自胥疏每為腋所悞翡翠巢南林亦以文見捕
世人玩葩藻投老終莫悟夫子抱清浮以鈍守中素
還能遠囂聲竭來隨煙霧予亦畏壘民從子返初步

春日閒居和韋蘇州

亂髮午未梳豪居幽興生焚香了清晝無夢到京城
雨過山枝綠倚枝有餘情含南村水滿鵝鳩聲催耕
地僻

金史卷之二
卷二
語論稀牀堆圖史清謁來坐成嬾那知世網嬰

題許氏夫婦節義

夫因為弟死婦乃守夫節一門節義俱聲光繼前哲
呱膝下兒衣食賴提挈夜窻機杼聲孤燈半明滅白髮
映青裙投老志愈烈磊磊澗底松凜凜巖上雪感慨歌
此詩燈前聲嗚咽

贈別王與時方伯

海中三花樹石上五粒松與子今有約相候尋其踪
塞

衣白雲杪時戲蒼精龍手把古苔篇還訪崑崙峯峰頂
嚙玄露長令有好容回首謝塵世莫教生秋蓬

夢採藥王屋山小有洞

夜來何所夢所夢在名山采藥小有洞長鑱亂雲間忽
覺異人境已知自不凡青厓貼天日下照芝草斑雙轅
駕白虎遙見仙人還向前心自喜飛步相追攀手把翠
雲蓋懇求啓秘闕長日不肯語相待神自閒但教食雲
霞要留好容顏一笑還自悟白日遊塵寰

首夏一日坐錢員外仕宏竹間小樓戲簡

首夏鳴禽繁晏坐竹間樓天風灑琳琅碧雲衣上流焚
香了長日短童具茶甌枕簟對青山頓覺五內幽地僻
不受塵主人更清修何當拜龐老同入鹿門遊

張山人

張子湖海士弱齡自崛起讀書法前脩隱棲茆茨底曠
哉山水情鶻冠烏皮几巖花紛始紅石耳翠還紫觸物
發幽響清詩有妙理遠慮累可輕遺榮心自喜緬邈山

中遊百世懷杖履

送潘子北上

潘子南中秀意氣凌飛鴻出門佩雙鞬告別時匆匆駕
言遊燕趙覽光蓬萊宮杖策謁天闕危言開帝聰上以
陳王道下以陳民風慷慨抗高義披肝瀝其衷子亦魄
礪士失志岐路中長劍拂鞶厲側睇心冲冲願子茂大
猷寤寐思所崇

題程時望介齋

新安昔上郡黃山秀而起程氏重黎後居此古仁里異
代見孤操眼中得吾子結茆山之隈行歌青澗底飲泉
義固在飢凍未應恥千載於陵翁可以同此理

題汪庸夫孫道甫道義同心卷

兩兩澗底松鬱鬱歲寒操青青百尺絲上有女蔓草女
蔓不終好一夜風霜老

太白山人漫藁卷二

欽定四庫全書

太白山人漫藁卷三

明 孫一元 撰

七言古詩

松樹障子歌

眼底何人畫松樹一株兩株拂煙霧青入石泉形影空
老摧岳壑愁日暮山鬼作靈夭矯行於菟受縛却回顧
摩挲雙眼看看不真恍然步入廬山路氣寒心悸狂欲踰

仰面大叫真宰怒雷霆排空頃刻成茆堂却被風拔去
停盃收卷起長嗟四壁秋聲雨如注

畫孔雀引

吳溪大絹長十尋何人奪此造化心不寫凡鷹與快鶻
獨寫青山石上之文禽高冠照水弄深碧翠尾隔花浮
暗金文章真合自嫵媚雌雄長日青樹林君不見杜陵
詩中語意深見詩對畫如見箴赤霄玄圃須往來慎勿
渴飲寒泉陰

咄咄行

太白山人愁咄咄
洒淚盈把眼
見骨夜深按劍
燈熒熒
出門萬里天
突兀長江老
龍作人語
熒惑正照江之滸
短衣蒯緱節
士歌破屋陰
風動環堵
蜀之劒閣國西門
貳貊久據揚風塵
暨儒幾年秉旄節
民命視同鼎中鱗
憶昔孝皇養士恩
銀章朱紱出入尊
白頭至今坐通籍
急難誰肯排天閤
嗚呼此事難再舉
君臣大義從斯敷
回首欲投煙霧深
釣竿獨抱滄溟去

酒酣歌贈鄭繼之地官

司徒之官不可求早年通籍金閨遊青袍只今厭奔走
兒女衣食泣道周屢見文章出翠釜未聞廊廟登天球
鄉關萬里望不及風吹離思江花愁野人勸汝早歸來
塵埃骯髒難為儔朝廷屢孽未除盡早晚尚有巴蜀憂
冰雪照野驚歲暮行人烽火多阻修天狼出明東海岬
哀凰獨叫西康州酒酣對汝不料事為此長歌歌未休

黃山行

黃山昔云與天通三十六峯常冥濛晨昏日月轉地中
下連滄海沃焦東暍陽一足啼遠松天雞野岼巢高風
中有靈跡世難窮洞門水簾捲鬱葱五色閃映金銀宮
秋風花落青桂叢聞有高人秘其蹤洗藥流出砂泉紅
長年兀坐石牀空萬物入手愁化工吾聞此山元氣鍾
異人往往時相從苔篇鳥書雲霧封我來啓此心忡忡
洞裏韓終倘相逢倒景同佩蒼精龍萬二千年壽無終

山中人歌

山風日暮吹黃獨山人歸來山中宿白雲萬頃高映屋
山光相對眉髮綠萬物到手吟不足詩草牀頭牛腰束
麋鹿相過亦不觸毳袍芒屨識高躅上皇之時道超俗
吾聞不死遊亭毒我今鍊藥山之麓山中之人駕黃鵠
劒閣行寄彭濟物總制

老子輕裘豪且雄挽弓射龍江水中落日半壁翻江赤
巫峽明月啼猿狖中原一髮渺何許峨岷萬里來秋風
古云劒閣罪真宰盜賊竊據今無同地生度量固人力

全活民命天為忠健兒倒戈喜多夢歸來散馬關之東
燕然銅柱亦細事致君堯舜臣之功野夫甘守西山餓
再見庶物回冲融庶幾乎再見庶物回冲融

松厓歌寄方方伯壽卿

吾聞徂徠之山截嶭高萬丈上有古松千尺蟠踞厓之
顛白日行天不到地蒼藤翠蔦倒挂相鉤連皴皮剝落
根半露偃蓋反走枝相纏下有元精山靈秘流膏入土
今千年樵人牧豎不敢伐乃知神物天能全陰厓半夜

起蛟螭哀壑萬里含雲煙世間此木不見用偃蹇獨卧
空山前只今大厦將傾圯風雨無庇真堪憐嗚呼安得
此木供採用能令四海蒼生重熙然

南屏山歌

屏之山兮高且閒雲冥冥兮水潺潺
山中人兮古心顏
坐白石兮擷翠管雙鳥忽兮翻飛念塵世兮多違夕陽
下兮千里眇悵望兮不歸

吳氏雙桂歌

吳家軒前有雙桂虬枝曲鐵相交蹉黑颿一夜鬼神會
天香墮地愁素娥露靄向曉半身濕煙痕翠剥莓苔多
邇來更借栽培力開花無數黃金柯君家兄弟好奇古
攜我共坐青婆娑月色輕搖白鸞筵秋光浮動金叵羅
氣酣耳熱發大叫仰面不怕真宰訶寒蟾無語玄兔泣
一泓翠影搖山河相看一笑唾壺缺攬筆贈君雙桂歌

題梅花贈太守黃子和

使君作郡滄洲邊我曾一見神翛然長髯方瞳有仙骨

種梅猶記羅浮巔瓊盤鐵曲一萬本茆屋正在春風前
寒姿自照日杲杲白鶴下叫青溪煙我歸管領君勿嗔
采花拾實還候君

南榮老人歌

南榮老人睡起晚過午柴門日初轉下牀看山嬾不冠
山光樹光渾莫辨秋風更覺草堂深鳥雀相馴機事淺
平生得處不須書愛雲弄泉歲華晏

跨驢遊西山天竺寺

秋葉滿林吹亂紅秋光半在山寺中老衲迎門解幽事
一見呼我長髯公薰爐相對坐中夕松聲泉韻何冲融
獨鶴隔竹向人立欲鳴未鳴幽意同氣酣日落豪思發
詩成三繞青桂叢造物小兒玩人世俯仰何必悲無窮
布袍斗笠自高格狂歌醉叫驚山翁歸來明月散林影
驢背仰嘯秋山空

泛高士湖

有引

正德乙亥孟春十四日予與石川子泛舟西

湖時石川子著方山冠予戴華陽中被高士
服把酒四望予顧謂石川子曰昔青蓮居士
李白與尚書郎張謂泛沔州南湖因改為郎
官湖今日予與子遊頗追跡前事西湖固可
為高士湖矣石川子一大笑酌酒于湖命予
作詩紀之予時已爛醉即信口長短成篇不
竄易一字

我聞唐家李白一世賢郎官之湖至今傳我今與子繼

其跡勝事豈許昔人專
方冠野服興不淺
駕船載酒凌蒼煙
千山萬山兩岬如羣龍
蜿蜒盡在几席前
青山落杯底
白日行舟邊
鼉鼉突兀波面出
大魚小魚爭避船
君把斗酒我歌扣舷
天風下來雲葉翩翩
爛醉騎鯨遊崑崙巔

春前五日大雪

一夜雪飛石徑齊
清晨壓我茆屋低
小奴開門抱甕出
赤脚汲水愁衝泥
牆頭飢烏太無賴
繞我堦上啞啞啼

南山黃獨寒無苗長鑱歸來風怒號

按察使劉元瑞惠寶劍歌

劉侯意氣天下無惠我寶劍來昆吾腰間斜解虎頭綬
魚皮纏鞘蒼波瀲鑄煉自是神明力歐冶已死風胡徂
泰山為砥作平地東海出淬蒼鱗枯星迎寶鐔孤光動
赤帝篆文留其膚天地相視忽改色樹木慘怛風號呼
空山日暮熊兕走蛟騰鯨駭翻江湖黃雲古壘結不散
寒鷗嘯雨愁荒蕪憶昨邊烽接天起闕城不守失邊鄙

天子憂惶費經理今雖掃逐猶未已國無守臣國之恥
劉侯劉侯莫輕擬元也關中豪傑士只今契會風塵裏
酒酣擊劍哀歌起揚眉結義從此始萬里同行報天子

謝鮑山人採松花見寄

山人縛屋黃山巔青松萬株盤屋前春風摘取花滿裏
逢人遙寄吳門仙吳門仙人身已輕服花更向靈氣生
白日獨坐若木下滄海如席龍不鳴昨夢訪君松樹樾
赤脚蹋雲石苔滑天風颯颯吹欲醒歸來松際留明月

錢員外畫小石山歌

錢侯畫石大者如踞彪小石犖确如驚蚪雲際十峯五
峯出白日不動蒼煙浮中有山人煮石處茆屋藏縛青
厓幽黃鶴飛來飲丹穴月中桂樹枝相樛錢侯錢侯有
仙骨手奪造化與天侔我有仙人九節碧玉杖與侯還
訪崑崙十二之蓬丘

致道觀看七星檜樹歌

海虞山前突兀見古檜眼中氣勢相盤拏上應七耀分

布有神會地靈千歲儲精華皴皮無文盡剝落老根化
石吞泥沙據山嵒嵒映壑鈇斨身枯溜雨枝黑藏蛇佇
立頃刻雲霧遮日落未落山之厓同行觀者皆歎嗟舌
捫頸縮無敢譁歸來靈物不可究夜宿撼牀恐龍鬪

鮑氏藏書樓歌

鮑君藏書十萬軸氣壓石渠吞天祿縹囊紺帙盡古今
竹簡蝌蚪驚觸目昔從惠子見多方後聞張華載滿轂
唐時世南行秘書豈獨李邕號書簾今於君家盡見之

八
卷三
挿架堆床動成束我夢化作太乙精手燃青藜訪君屋
緯象玄文發隱奇夜半風雨衆靈哭嘗聞聚書後必興
况是魯齋舊儒族六經行天日月明文章未學厭紛逐
鳳哀麟死三千春主持吾道寧無人

題古木竹石圖

石根拖雨雲脚過老木鈇斲石欲墮白日抱珥天色微
翠葆含吟風勢大山空往來不見人山鳥一聲山竹破
當時此畫作者誰湘娥猶泣真宰悲

吳偉瀑布圖

何人畫此瀑布圖
巔崖老樹雲模糊
風前披拂佇玩久
筆力乃是江夏吳
吳生當世名第一
揮毫落紙人莫及
骨格老硬神氣清
飛濤漱石石欲立
懸巖遠勢亦可愛
直瀉似是廬山派
榭葉瑟瑟天風來
晴沙碧嶼蒼茫外
美人隔水把瑤草
鴻雁雙飛鷓鴣小
天寒日暮意無極
青石漠漠望中杳
我生蹤跡真好竒
年來遠結滄洲期
眼中見此足幽賞
分泉煮石聊自怡

黃山歌贈戴仲良

吾聞黃山三十六峰青挿天懸厓峭壁萬丈飛流泉古
松盤壑風吼地蒼藤翠鳥白日生雲煙奇石媚幽獨小
芝紅欲然若有人兮山之巔烹霞煉石元化旋宇宙入
手春無邊有時黃鶴鳴翩躚且吹玉笛桃花前月明相
約講重玄我來手持青苔篇龍漢之秘心相傳洞中一
笑三千年

蟠桃園為鮑氏母壽

鮑君寄我蟠桃圖絨書相示來中吳索詩詠圖為母壽
牙籤錦軸雲光敷風前披拂佇玩久滄海萬里島嶼孤
紫文紺核大於斗此木要與凡植殊春風倒捲絳羅袖
酒暈時上紅玉膚雲烘霞蒸光不定一顆不易千明珠
昌容綠華駕文鯉王喬琴高乘白鳬摘桃實兮來仙都
飄飄蕙帶雲霞襦捧桃獻酒為母壽三千年後遊蓬壺

分歲詞

去年分歲東海涯今年分歲山人家地爐盤礴笑傖父

隔座呼酒聲啞啞采餌釘盤出鮮脆還從盃面分椒花
吳儂相向祝如願兒大軒冕田桑麻吾亦不祝亦不嗔
但教有酒壽吾身

題楊明府山水圖歌

楊宰手持山水圖打門過我聲相呼登堂展圖急相示
雲煙滿面秋疎疎畫者何人得天力長風萬里動地急
攬衣縮頸不敢前袖中怕有波濤入洞庭之派湘漢分
君山一點入青雲上有老龍吹笛處月明彷彿清韻聞

黃鶴樓前花事闌黃陵廟裏竹陰間沙鷗野鷺殊可樂
蹋浪翻萍時自還彭蠡兩岬煙樹依中有陶朱釣魚磯
飯餐鰕菜常容與手著魚經無是非楊宰楊宰心思聰
平生愛畫精天工要令我歸來處便是圖中陶朱公

平厓道人歌

道人致身何蕭爽縛屋青厓平如掌年來漫有雲霞想
道骨仙風日應長雲裏金支下翠旗夜半猿鶴鳴蕙帳
長生木瓢白石樽對月松醪引翠浪浩歌日暮采瑤花

大澤空山自來往

周舜卿山水圖歌

周生初學盛子昭畫手相傳心獨勞後來却擬戴文進
落筆開縑分秋毫氣韻浮動意已極挂出滿堂皆動色
山腰半掃雲氣橫樹杪瀟瀟天風急瀑布下挂蒼厓間
近看頗類匡廬山又見武陵桃更有商嶺芝松間似是
黃與綺皓首相從同避時一朝出山回帝力四海爭看
歌羽翼至今漢道有光輝對畫感事心歎息周生周生

名已著平生所畫亦無數此幅差勝盛與戴高堂白日
生煙霧

黃山歌

黃山截薛幾萬里亂峯如龍矗雲起晨昏日月轉山腰
三十六軸盤地底崑崙渤澥氣勢來衡嶽匡廬遠相倚
長年冥濛飛煙霞白日雜還走麋鹿玉泉丹砂鍾靈根
芝草琅玕長不死中有高人事隱棲縛屋開門亂雲裏
崖木野藤時作花澗水泠泠石齒齒牀頭木瓢白石鐺

簷頭甕牖烏皮几避世應同尸鄉翁著書還擬鶻冠子
我亦乾坤放逸人探奇名山興未已落日長歌招隱詩
采藥尋君從此始

題張玲畫四時花

張子寫生人歎嗟解衣停筆思盤拏金盃倒汁墨痕斜
挽回物力春豪奢風前脉脉牡丹芽小草濺濺爭含葩
夏榴秋蕖取次花四時會有重幃遮不教飛泊委泥沙
請子更寫古松枿清陰盤據山人家石鼎煮苓延歲華


西湖山居

道人縛屋南山裏，西湖正對柴門底。
藜杖經旬嬾出門，門前看湖聊爾耳。
秋風撫掌桂花開，坐對白石歌隱士。
溪翁住近不相知，晨昏同飲西湖水。

環溪釣處為陳憲僉題

長樂山水閩中雄，諸峯北來開巖崿。
一溪發源深莫極，環繞却與諸山逢。
山根倒插溪水碧，山靄冥冥溪樹失。
鵝鷖鴈鶩啼向人，四面波光山月出。
美人有時坐溪邊。

竹竿裊裊牽春煙腰間笊箸興自好日暮吟對江花前
我亦平生稱釣翁十年避地滄溟東他時倘慕三花樹
萬里來尋煙霧中



太白山人漫藁卷三

欽定四庫全書

集部

太白山人漫藁卷五

詳校官庶吉士_臣李如筠

中書_臣劉源溥覆勘

總校官原任中允_臣王燕緒

校對官中書_臣牛勣文

滕錄監生_臣蔣翰

滕錄監生_臣齊兆求

欽定四庫全書

太白山人漫藁卷四

明 孫一元 撰

五言律詩

秋興二首

白幘乘高興
青山載酒甌
登臨歌猛士
形勝俯南州
龍卧江光晚
鵬盤雲色秋
西湖有狂客
吹笛遍滄洲

平野秋光淨
廣川落日虛
紅留楓樹晚
黃見菊花初
時

序悲舟楫江湖無諫書南山歸卧處還喜有茆廬

渡江

斗酒醉初醒長歌望海門晚山橫北固落日照中原沙
白鳥雙下天青江獨吞壯懷方激烈危坐欲騰騫

看山

支郎構別業龐老遠塵寰偶到無言處來看江上山風
簞元不整水鶴自飛還殘日漁樵盡柴門影獨閒

讀孟浩然詩

春水長蘭苔春鷗來復饒雲光欲到地江色澹相搖濁
酒同漁父輕風動野袍峴山斜照裏歸去趁鳴橈

同沈啓南吳門載酒泛月二首

望望蒼茫裏間雲度野田山空偏受月水濶不分天酒
殘初侵夜星河半在船白袍江海上櫓散自年年

微茫風日暮歸鳥下青田暝色遙吞樹波容澹寫天豚
魚不吹浪萍葉故迎船笑殺鴟夷子浮家不計年

登越江城寄彭濟物憲副

鼓角風初曙登樓倚望時
春愁迷斷雁野色帶荒陲
千里雲山夢十年江海詩
兵戈阻前路還繫故人思

有客

草堂對湖水地僻有高情
雨意開林色秋光泛菊英
到船覓魚蟹有客過柴荆
長日看山處相留几簞清

曉起

曉起風威急江城鼓亂搗
沙明初報日樹凍半留花
末路無騰蹋孤懷有歲華
平生杜陵老爛醉是生涯

癸酉六月望夜同施邦直棹舟西湖歷六橋抵
望湖亭乘月登孤山拜和靖處士墓

向曉南屏路相攜上釣輪山根晴亦濕湖面夜難昏月
色留吹笛鷗羣避洗樽來尋林處士地下有知言

戎馬

戎馬臨關塞笳聲遠地哀朝廷聞選士道路困輸財星
月天山動烽烟瀚海來安能有飛將坐掃陣雲開

漁父

野水平於席中流風力微江花迎日淨沙鳥背帆飛黃
帽為漁父青錢買釣磯只今鷗社裏投老願無違

聽泉

聽泉坐厓石來洗人間煩到面葉聲亂隔林雨意喧調
高元自得道在却誰言歸路不知晚還看白鳥翻

席上沈啓南先生限韻賦白荷花因柬錢士弘

水部

越女起新浴亭亭立晚涼波明弔清影露冷薦瑤觴與

月還同調無人只自芳永言老南浦願不嫁東皇

送杭東卿憲副入京

對面意不盡長風吹別襟江湖浮樹杪鶴鶴下秋陰羣
盜還多難諸方慮已深治平望公等堯舜格君心

夜起煮茶

碎擘月團細分燈來夜缸瓦鐺然野竹石甕瀉秋水
火聲初戰旗槍勢已降月明猶在壁風雨打山牕

謁孤山林和靖處士祠

我識林居士角巾老不妨文章餘琬琰山水借聲光
老鶴迎人立疎梅作意香誰言傍脩竹配食水仙王

憶昔

憶昔雲中士括囊秘命修於菟馱醉影老劍伴清遊
絕火毛三伐飲泉月一杯十年回首處天地隔滄洲

晚霽

晚來雨初霽煙火隔林微一徑牛羊入孤村桑柘稀
長天下遠水積霧帶岳扉月黑聞人語溪南種樹歸

月夜同施彥器毛應奎二憲副三茅方丈對飲
得饒字

意極不成舞角巾醉裏豪萊施悲道路山水自漁樵白
月照斗酒長風吹鬢毛夜深催擊鉢一笑得詩饒

月夜登臺和彭濟物韻

凌虛有古榭入夜月同幽桂影吹欲散水光凝不流酒
杯落吾手詩句破高秋見說盧敖在同追汗漫遊

送彭濟物憲副赴闕

多難還分手秋邊一劍雄青雲懸短夢白日照孤忠驛
竹啼山鬼江汀卧晚楓兵戈猶在眼好奏未央宮

夜坐東錢員外士宏

中夜不成寐屋梁落月空攬衣驚鼠散看劍炙燈紅吾
道空山裏年華細雨中故人有傲吏相憶興還同

對酒

岳石韜弓劍風塵混客身易消吳地酒不見隴山春失
路無騰蹋供愁似衆人獨憐嵇叔夜何處可藏真

幽居雜興十首

草堂連翠微一徑轉柴扉竹裏厨人散雨中春事稀蜂
房爭自課花片覺全飛政愛蒲團好焚香了化機

六籍聊遮眼高眠傍屋牙春來詩得計老去醉為家門
映斜陽樹山開背郭花鄰翁間有約相對話河車

十日荒城雨開門草又新若無一杯酒辜負百年身澹
澹春園野青青山近人喜看江上影依舊白綸巾

野次寡輪鞅春深漸輟耕幽禽隔樹小滋蔓上墻生蒲

長青堪把桑空繭欲成自緣耽野趣不是愛逃名

歸卧茆簷下讀書終愛貧鷺聲十年事草色滿城春道
喪悲浮俗情高夢古人眼前君莫問我與酒盃親

雞聲催旦暮歲月夢中移雲漢空回首溪山獨占奇買
船同鶴載得句報僧知却笑南華子閒看野馬馳

柴門春雨裏野水明荒陂碧草看還長白袍閒自知短
歌聊起舞扶醉強題詩元有林泉志歸來更不移

清風生甕盎吾亦愛吾貧看竹雲連屐釣簾雨映人梅

花偶到座硯水動浮春意外渾無物青山共此身

小艇初移棹搖搖進遠風晴江獻嶼碧老樹消春紅斗
酒長吟處百年無事中釣竿如在手便好作漁翁

睡起不自好出門望遠山碧雲回夕色老木澹秋顏道
路從違裏荻蒲坐嘯間吾師白鷗鳥長日與同還

贈別顧華玉謫全州

桂嶺經行處泉聲日夜潺飛蛇晴挂樹毒霧晝沉山去
國鳴孤楫傳詩到百蠻柳侯讀書處遺像沅湘間

江南道中

去國烽烟異懷人涕泗滂九關啼虎豹三月裹餼糧日
晚漁人語雲回雁路長請泥吾豈敢晏坐恐垂堂

鵝湖費閣老見訪山中作詩贈之

天遠辭朝日江清一棹東艱危思欲濟留滯氣還雄水
宿魚龍國帆連鸛鶴風便隨梅福去莫問國師公

重遊江上寺

重遊江上寺相對一樽開耒耜知天力東南息戰灰堞

樓浮海動潮勢抱山來落日聞人語漁樵一徑回

聞開化兵亂問訊吾廷介父子

問訊南來客移家近向城長貧方學道多病更聞兵顧
我蓬蒿質憐君江海情續盟定何日瓢笠祝融行

費鵞湖閣老顧與成參議同訪有詩見遺依韻
和答

雨餘秋寺裏一徑轉松長上客同乘屐高人獨據牀塔
陰眠石壁鶴跡遍山房歸去猶餘興看鷗意不忘

感興

作詩久成祟身世困天弢夢斷心猶壯燈青首獨搔梨
花三月暮春水一帆高何處歸來好看山破白醪

江城東殷近夫

沙上風煙異經時老客心遠天低故壘落日帶空林目
極芳華晚愁緣野水深江城有嚴武猶可慰孤吟

席間戲和近夫

江上風煙好依依俗更敦故人有傲吏喚客共清樽覓

句開梅閣投壺對竹根一春狂未了頭戴小烏巾

對雪

清晨寒威作倏爾失荒陂飢鳥噪欲死老鶴光自奇斜
斜全傍竹脉脉政宜詩西湖理釣艇憶得去年時

避寇吳興山中二首

日暮漁樵散山空河漢明柝聲悲永夜戎馬閑孤城去
國美人盡感時黃葉生酒杯徒自好極目一霑纓

露下蟲聲雜蓬門月色沉燈明人按劒風急虎行林南

國兵戈滿中原涕淚深
衽衣挽不及卧病北山岑

簡邵國賢少司徒

青鞵偶城市邂逅喜相投
一笑滄江遠到門拄杖留人
文望吾子天意老漁舟不盡
風前興寒花卧晚幽

寄山中相知

世間果何意一事我來無
碧海分琅菜青天夢白榆笑
看驢背影又落華山圖欲語
無人會月明獨自呼

西湖

十里山如拭西湖背郭流僧歸虹外雨雲抱水邊樓春
事多逢醉歌聲半是愁獨憐垂釣者吾欲共滄洲

同董子言陳用明沈天用僧古心晚涼攜榼湖
上以老杜山青花欲然分韻得花字

六橋尋勝處去去望中賒樹老秋連石湖酣晚映花山
光酬野客詩意愛漁家歸路殘陽裏鏗鏗拄杖斜

夜過王漢章留酌

一笑真良晤相看意氣同杯痕寒較淺暝色坐來空倒

幘高人醉焚香秀句工阿咸更清絕愛客似而翁

月夜過凌時東

角中興自好愛月訪柴門幽事同吾子青山閣酒樽江
風動高樹野水明孤村欲問今宵意漁歌起釣艚

宿歸雲菴

獨坐山中寺境閒真意存瓦燈燃石壁松葉暗柴門夜
久無羣動詩成偶自言上方鐘意早山月落前軒

秋夜不寐

造物終難料夜長耿不眠酒醒燈暈裏秋墮葉聲邊
盜乾坤夢溪山藜莧緣平生陳正字死不受人憐

沈啓南挽詞

風流驚絕代投老有餘情海內求詩草圖中聽水聲
多憐蹇拙天亦愛聰明回首荒山道斜陽草樹平

夜宴

河漢近瑤席開簾空翠生金杯搖夜影盡燭剪春聲
一笑藏鉤戲低回舞雪輕歡歌雜未歇澹月照三更

送許天賚赴春試

角中快一識相對殘陽紅多路笑我拙收功與子同山
青去鳥外春滿片帆中政恐釣竿手畫眉終未工

劍

得自昆吾北土花尚蝕紅歌魚志終俠斫地氣何雄寒
日飛孤電晴空走白虹平生忠義在仗爾靖蠻戎

晚晴信步至城東草堂主人開樽留酌

東風吹晚步拄杖散閒身燕掠春陰薄鳩鳴桑葉新過

君文杏館呼我謫仙人政有煙霞骨還知麋鹿親

毗陵李太守禦賊

戰格東西破孤城誓始終自揮朱雀幟衆擁紫髯公吳
楚哀歌滿江湖控制雄為憐巡遠義須愛戡城風

休寧汭口十詠

旗山

有美神明地青山旗勢開連村看世胄繼代有賢才赤
羽迎雲出翠華拂日來人家讀書處高下見松梅

鼓石

平野山根出形如一鼓橫何人費修琢真宰自生成苔
剝青猶好雲深濕不鳴太平有樂部還擬獻承明

筆峰

山勢南來遠筆峰獨不羣煙嵐晴露穎草木碧成文人
物千年秀道源百世聞夕陽重回首高望入寒雲

硯嶺

一帶嶺橫起渾如硯琢成咸池清露滴仙掌黑雲生元

氣天應結人文世久明
誅茆山麓下閉戶著陶泓

賜谷

谷口日升處雲開萬里輝
遙看峯影出漸覺露華稀
地煖禽聲樂泉甘草木肥
端明種松處百萬已成圍

雲溪

落日溪光淨閒來坐石磯
因看異人跡猶見紫雲飛
岼圻楓根出沙寒石髮稀
懷賢增感慨回首意都違

龍山

蜿蜒山脉好神物欲飛翔亂石蒼鱗動千松翠鬣長地
形接閩越人物自梁唐山脚遺祠在題詩仰末光

鳳林

聞道東林竹當年有鳳鳴濕雲吹不散涼月亂還明疎
見晚山色遙連茆舍清豈無逸士駕載酒寄高情

鄉約

休陽萬山裏民物義相敦耕鑿猶前古詩書自一村應
看風俗厚尚有典刑存遺訓追先哲年來德業溫

亂石生寒靄殘林帶晚曦松涼供睡穩山靜與詩宜入
洞隨猿跡登崖割蜜脾竭來天壤內此地可棲遲

同凌時東吳介夫僧古心遊虎跑寺泉頭分韻
得空字

長日尋幽處穿林興不窮把杯秋寺裏得句野泉中山
路晴吹葉石梁晚度風有僧同杖屨更洗世情空

失鶴六首

有引

余蓄一鶴一夕開籠調舞忽爾高逝長望不

還時松房夜寂風月清烟獨引步顧影誦唐人想伊只在秋江上之句因用首尾作詩六首付童子長歌以招之

只在秋江上孤音何處聞夢回千里月愁入萬山雲欲賦招難返長憐思不羣此時還憶汝書寄武夷君

只在秋江上連宵信不通忽看雲外影漫擬頂間紅樂府音猶是山家籠已空此時還憶汝學舞小庭中

只在秋江上長吟首重搔避烟茶已熟窺戶月初高山

角聞孤笛湖陰夢小舸此時還憶汝把酒興空豪

只在秋江上高飛竟不還君應憐遠漢吾豈戀區寰雲
冷難成夢月明疑扣關此時還憶汝何處訪蓬山

只在秋江上孤蹤竟所之花間扶杖處竹外聽泉時野
客來玄圃山僧寄紫芝此時還憶汝伴我夜吟詩

只在秋江上烟霞幾萬重堦前留墮羽苔面想行蹤雲
影忽傍水月明猶在松此時還憶汝跨我出樊籠

西渠亭會別周叅政楊顧二叅議

對酒山亭上清秋思更豪輕鷗動江色片雨帶林皋興
逐王司馬詩當何水曹分攜聊一笑日暮上漁舸

寄越中諸友

自別西湖上逃名人不聞飯甘黃獨味身在野鷗羣俗
病難相惱靜居已策勲何時還一笑採秀入閒雲

贈鄭師準

有引

浦江義門鄭師準訪予山中坐次因與談先
世同居之義鄭氏自宋建炎初至我朝居已

吟社

續代開吟社佳時賸一遊
思奇山改色興到鳥深愁
大雅聲猶在黃初派尚留
太平風物好有句頌皇猷

荆溪道中

樹夾蒼厓立遙遙溪路微
浪花迎棹尾山影上人衣
飢鵲鳴將下頽雲凍不飛
還尋舊遊處日暮漁樵稀

幽居二首

萬事歸來好幽居養性靈
教兒收藥裏留客話熊經
投

老丈人行生來處士星相過君莫問身世一魚舲
自得窮通理幽居不誤身清流梳石髮遠霧着山中竹
上僧留偈庭前鶴近人科頭坐終日吾自愛吾真

王方伯與時製深衣幅巾大帶絢履見遺小詩
裁謝

教化尊方伯能令風俗敦人文今更煥吾道喜猶存居
士香山社先生獨樂園興來風日好行傍柳花村

永嘉王子揚見訪山中留酌

樽酒歌聲發蓬門秋意深
泉光浮野竹山氣濕空林
一笑得吾子百年獨此心
便期同隱操更喜有高吟

山寺對雪

寒入山中寺今晨雪意逢
清樽留客過野興對僧濃
別渚迷鷗影深林印虎踪
此時誰會我倚杖立高松

送吳希明

送子長楊渡白雲歌未終
江山情共別燈火夢還同
一路黃梅雨半帆白鳥風
波聲催棹急何處寄詩筒

宜興吳克學雨中遠訪予于吳山一宿而別詠
此送之

故人共短席相對酒杯深一宿蘧廬夢百年翰墨心雨
疎分薄曙蟲響起空林後夜成相憶月明何處砧

僧明秀東林別業

結屋東林下市廛迴不聞疎花寒照雨老樹暝巢雲摩
詰元非病懶殘不忌葷茹簷瓦坐處萬物自芸芸

石林

十餘世歷三百餘年合數千指而食守宗法
不墜宋元二史具載孝義傳中而我朝猶以
孝義顯被殊恩之盛然則舉斯世之大而義
之間見者僅僅若是是可嘉也亦重可歎也
作詩贈之

義居聞鄭氏十世浦江濱國有張公藝人傳李自倫宗
文今更見俗化喜猶淳海內樊籬共寧無感激人

虎丘慧上人山房

全宋詩卷四
占勝景相於僧閒水竹居
牕幽滋蘚暈樹老帶蟲書
石鼎秋聯句溪園夜剪蔬
買山錢可借許我築茆廬

獨往

無媒幽徑迴笑語領東風
遠燒攬新綠寒花動小紅
野情藜杖底詩句酒杯中
一路春相候何人識化工

燕都張子言訪山中

有客自高格入山從我遊
衣裳上雲色几簟枕泉流
嵇叔遠世味山公得酒傳
柴門近湖水還可到漁舟

春日吳門和李獻吉見寄二首

春水動幽興江行人跡稀青楓隨浦斷遠鴈與雲歸過
雨花經眼停舟山近衣長吟愁落日霞外看餘暉
漫艤吳門棹因成極勝遊野吟峯影出林卧草光流帆
面過江鳥雲陰開晚洲狂歌聊自得隨地覓巖丘

石亭

石亭圍野色晏坐長高情細竹通幽澗呼兒洗玉甕蒼
蒼松雨墮冉冉島雲生掃石題詩句長留真隱名

惠山寺

高卧山中寺，曹騰過午鐘。
身閒隨物化，意到與天通。
松閣雲光入，山泉雨氣空。
焚香憶摩詰，興味頗相同。

同顧與成叅議過蓉湖別墅分韻得禾字

龍山斜帶郭，樹密野涼多。
湖氣熏晴日，雲光淨綠禾。
茶瓜隨地覓，村徑與君過。
佇愛幽居晚，兒童竹裏歌。

遊道場山

伏虎昔年寺，塔留雷半焚。
我來白日靜，鐘落青山聞。
亂

石開雲氣晴池散鳥羣遲回興不盡林葉落紛紛

雨晴

曉起雨初霽輕風到野袍日迎山氣盡天入鵲羣高出
澗喜新漲攜僧同小舫欲留還自去詩意動林臯

錢員外施藥濟人遠近風動作詩戲贈

濟世韓康伯辭官陶隱居花前開藥裹月下檢方書道
骨時應長塵緣漸破除高風動城郭人跡滿門閭

寄顧台州華玉

使君有道氣為政亦山中坐見桃花色青林度遠風才
堪一世用官與衆人同飢食菡溪椽長歌興不窮

遊龍井山

石磴攀蘿上天風倚杖吟鐘鳴山意動泉靜樹光深白
日觀雲物清樽坐石林歸來興更好纖月映孤岑

晚涼獨坐湖上荷花盛開

薄晚西湖上花開還自憐風回香冉冉鷗泛葉田田雲
色晴移水月明淨放船夜涼興更好獨坐釣絲邊

鄭繼之地官久不過湖上奉簡

怪爾狂吟客不過湖水濱寧遭官長罵莫得野人嗔雲
外烏藤杖水邊白鷺巾相看只自好空送月華新

同孟僉事望之登虎丘山

停舟倚暮色開殘對江濱山迴朱甍出鐘鳴碧殿聞林
花交野岬石壁動春雲落日狂歌客登臨興不羣

東郭草堂和王濟之閣老韻

草堂臨野水苔積路難分枕簟虛山月琴尊度海雲嗒

然真得道隱矣不須文長日少人跡門開鶴鶴羣

蘭

落日天風動空山蘭葉芳瀟瀟湘水濶冉冉楚雲長獨
抱幽人操空懷王者香隔江費褰采歲暮永相望

贈黃得之二首

海內談詩早聲名高適齊風塵同佇望衣食各卑棲落
日雙鵬急空林孤兕啼愁聞更出狩校獵羽林西

我愛黃江夏雲山夙有期風流懷上世瀟洒有清詩笑

拾滄江月行歌青桂枝嵇康得石髓王烈許從師

聞郡使者救水荒

地入黿鼉窟天連鷺鶴羣君心時注念使節日憂勤滄
海流雲氣青山捲浪文歲功猶足望歌頌動江濱

簡程確齋

有美人中傑名應入邵評易傳殷末世文尚漢西京樽
酒觀羣化衣冠異俗情率溪有長蘢釣取北溟鯨

海鹽陳用明朱元素僧明秀見訪山中酒次作

詩贈之

可人費招挽今喜過蓬門黃鳥坐中午青山意外春詩
新聯石鼎興逸逐清樽明日還相憶來歌白鷺中

題孫道甫東園卷

小開東園地閒來樂事宜幽懷流動處好鳥忽鳴時灌
藥引清沼護花編短籬主人足高興嵇呂共襟期

遊勝果寺

偶過江上寺政遇遠禪師泉石闌幽興雲山進酒卮小

樓園晏坐細雨好尋詩
隔塢茶煙起燒殘藤一枝

茆屋清溪上

茆屋清溪上漁歌入座聞
水光偏映竹釣石自生雲
地近青藜杖身隨白鳥羣
此中有真趣長日少塵紛

壽楊氏母九十

阿母逢初度北堂風日晴
花光動酒影玉笛轉春聲
女閣清樽在華筵白髮明
膝前供笑語願祝到雲初

送友人北上

扣舷歌小海判袂送君行秋入風雲壯鷗盤原野晴山
迎揚子渡潮語廣陵城還憶西湖上漁歌載酒觥

題孫以德竹窻卷

窻前立蒼壁坐對時蕭森秋影雲垂地夜聲風滿林寒
吹拄杖濕青入酒杯深湘客渺何許遙聞飛珮吟

贈友人之梁宋

壯志輕離別鏤刀拂雪明他方正多事中原誰請纓彩
裘違故國琴筑歌芳聲勸爾一杯酒出門空復情

石川子夜半相訪

境靜人羣絕夢回庭影空打門走狂客半夜驚山翁烏
鵲霜林月堞樓鼓角風更湏笑踈懶脫幘坐高松

宜軒為吳孟端賦

兄弟古所愛君家義仁行青春池草夢白日棣華明賴
上荀文若吳中陸士衡詩書有家學不負竹洲名

次韻寄祝維貞員外

歸來光範門書策不須論白日自幽事清泉在小園鳩

欽定四庫全書

卷四

鳴開竹閣月曉過梅村鄰父時時會壺觴笑語溫

孫萬春挽詞

西風起天末驚失少微星問字人初去燃藜火尚青竟
眠藤樹槭難起草堂靈偶過西州路令人涕泗零

觀魚

步履石池上觀魚坐短蒲翻萍銀撥刺吹浪雪模糊沙
白雲光淨日斜島嶼孤濠梁相對處吾亦偶忘吾

浩嘯

浩嘯竹林間來過湖水灣
晚花餘色淨雙鶴照衣間
用拙思深隱時危慚獨還
狂歌聊自得隨意弄潺湲

發漕河

初日浮高樹清鷗散淺沙
挂帆湖水上聞笛野漁家
坼菰蒲合雲迷山郭斜
芳洲動幽興自起采蘋花

歲暮

身世馬虺隤索居不用媒
恩多貧曝日吟苦飢鳴雷凍
鵲遲遲下晴梅鼎鼎開
詩書娛此夕吾意老山隈

春日王氏池亭一首

別浦漁歌近臨流水檻開主人時杖屨斜日在莓苔沙
淨新篁出亭幽羣鳥來習池風景異喜有葛強陪

大善寺贈惠上人

訪客溪邊寺惠休解愛才高吟時野興小坐引春杯翠
壁雲光薄青林雨氣開會當忘物我相對碧山隈

過黃勉之明水草堂

去去草堂遠懷人藜杖過青林散山靄翠壁吹江波竹

裏鳩聲切吟邊野興多相看皆道氣白日卧雲蘿

同吾進士謹遊陳遂初湖上草堂

野徑山光裏草堂湖水傍開樽臨絕壁岼憤俯滄浪虛
渚秋光淨高雲晚木涼同遊得朋舊歌罷興偏長

飲惠憲副北屏別墅

對酒清溪上聞歌杳靄間竹光酣晚日雲影動秋山好
鳥移時下名園盡日間主人愛瀟散野客不知還

寄鄭繼之

少谷平生友青雲半載離豈忘吳地客不寄鴈門詩嘯
傲定何日經綸須此時後期解朱紱同飽九莖芝

訪許進士台仲九杞山中二首

山水經年別樽壘十日留柴門沙月動木榻海雲流同
愛名山隱難忘帝國憂何時解朱紱一笑共滄洲

下榻山中夜論交海上村百年同意氣雙淚獨乾坤木
葉風江亂秋燈霧樹昏滄洲終自好白首釣魚船

溪堂落成鄰漁以蒻笠草蓑見遺

卜築苕溪上幽居景自賒杜陵今避地龐老喜移家石
榻青霞滿山樽白月斜鄰翁惠釣具雲水足生涯

尚書許公挽詞

四海哀良弼百年憶老成西風吹盡翬落月照丹旌相
綬懷當日戎冠識舊名我為天下念回首一沾纓

南軒下梅數花初放對酒盡日

春日南軒下數花梅已香疎枝通月色淡影接溪光忽
忽小詩就悠悠孤興長會須憐獨立對坐領年芳

陸氏永思堂

堂在溪流上門開雲樹中青禽迴野日黃葉引山風何
日烟霞地來尋桑苧翁把酒坐終夕回首茨門東

同凌時東邵文化沈邦魁飲戴山大石上

載酒問山寺尋幽過遠林殘霞依水淨新月隱杯深坐
久頻移石歌長得賞心青春元自好歸櫂有高吟

哭吾惟可

前年近夫死今日汝云亡泉石音容外乾坤涕淚傍才

名悲造物星漢失文章吾道竟誰語寥寥孤夢長

漫筆用姑蘇文秀才韻

脩然脫塵累浩汗竟何之千里雲山夢十年江海詩魚
龍酣白日鴻鵠自清時著眼觀羣化長歌酒一卮

秋夜不寐

蟲聲破孤寐起坐轉蕭騷白露星河近西風鴈背高江
山泣吏卒天地入旌旄老眼蒼茫外長吟首獨搔

夜雨

寒柝聲初急殘燈燄不修長吟聞夜雨獨客卧江樓節
物東山念朝廷西鄙憂驚風振叢薄迷鴈失灘洲

枕上漫爾成詩

枕上三更夢愁多記不分長天低野樹苑屋帶星文月
色萬里靜江聲永夜聞武夷猶汗漫宗社想諸君

題愛日樓

高樓奉親處日色滿簷牙壽祝靈椿樹詩歌丹棘花綠
樽侑几席白髮悅年華春靄階庭內蘭孫又茁芽

脩竹亭

脩竹何年種
虛亭散翠陰
清風自長夏
赤日避高林
裊裊山雲淨
娟娟溪霧深
地偏人不到
來往動高吟

太白山人漫藁卷四